



FOTOS: MAD

Il scazi da plaiids rumantschs dal'Institut Dicziunari Rumantsch Grischun.

LA MEMORGIA DA LA LINGUA

Mintga lingua ha insanua in'academia, in gremi u in institut che s'occupa da temas linguistics, da la tgira da la lingua ed er da novas creaziuns linguistics. Per nus Rumantschs è quai la Societad retorumantscha (SRR).

A questa societad appartegna l'institut ch'edeschia il Dicziunari Rumantsch Grischun (DRG) – in'ovra monumental ch'exista dapi genera-

ziuns e nua che vegn registrà mintga pled rumantsch cun sias significaziuns respectiv. Ultra da quai vegn er mantegnida ina fototeca. Rettschertgas linguistics e discussiuns en connex cun la lingua e cultura rumantscha vegnan publicadas en las Annalas da la societad.

Cristian Collenberg è ses president. Oriund da la Lumnezia abita el uss cun sia famiglia a Cuira. El è magister da linguas e di-

dactica a la Scol'auta pedagogica dal Grischun. Dad el avain nus vuli savair tge rolla che la SRR haja per la Rumantschia.

Gassetta Coop: *Tge influenza ha la SRR ozendi per il mantegniment da la lingua?*

Cristian Collenberg: Il pensum principal è la documentaziun da la lingua rumantscha. Perquai ch'il DRG dispona d'enconuschientschas integralas

da la lingua cun si'istorgia, contribuescha el a moda decisiva a la renovaziun da la lingua. Fitg dumandada è er la cussegliaziun linguistica da l'institut.

Tge è la lezia principal da la SRR per l'avegnir?

La documentaziun prestada al DRG è in'incumbensa naziunala che dura anc divers decennis. La societad sezza promova e vegn er en l'avegnir a promover la discussiun davart lingua e cultura cun arranschaments publics e publicaziuns scientificas. Dasperas fan ils redactors contribuziuns per ils meds da massa rumantschs, p. ex. vegn ina seria da locuziuns publicada gist uss en La Quotidiana.

Tge ha il rumantsch grischun (rg) da far cun il DRG?

Il rumantsch grischun è per nus in instrument current. La promozion dal rg è l'incumbensa da la Lia rumantscha. La SRR è in'unien affilada a la Lia.

Tgi po daventar commember da la SRR?

Tut tgi che retira in da noss organs (DRG, Annalas) è automaticamain commember. *Anna Ratti*



Dr. Christian Collenberg